

Zeitschrift: Annalas da la Societad Retorumantscha
Herausgeber: Societad Retorumantscha
Band: 43 (1929)

Artikel: Reverenda Otto Gaudenz : 1869-1927
Autor: Luzzi, J.
DOI: <https://doi.org/10.5169/seals-199788>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.07.2025

ETH-Bibliothek Zürich, E-Periodica, <https://www.e-periodica.ch>



Reverenda Otto Gaudenz

1869—1927.

Il pövel rumantsch ha gnü la disfortüna da perder infra pacs ans bain quants da seis melders homens, dals plü fervents e valents defensurs e protecturs da sia lingua e cultura. Be dal 1920 davent sun gnüts lovats in fossa Dr. G. M. Nay, il fin poet e novellist sur-silvan, Dr. J. Scarpatetti, prof. C. Planta, Florian Grand, Rud. Lanz, e la stà dal 1927 ha rev. Otto Gaudenz, il fondatur e president da l'Uniun dals Grischs, ün dals plü fidels e premurus figls da la mamma rumantscha, chattà il pos etern «a Scuol sün il sunteri». Davo avair combattü durante sia vita cun tuot si orma per que chi ais il plü ot e bel in quaiست muond eira el ils ultims ans dvantà stangel e bramaiva vi e plü dad ir a posar.

«Eu 'less ir a chasa,
Pro'l bap 'less eu turnar;
Pro seis cour patern ir vi a reposar.
Davent dal muond voless eu ir,
Entrar nel pos etern, nel pos quiet e tant profuond.
Cun blers giavüschs sun eu sorti;
Be ün sulet am ais restà:
«A chà, a chà voless eu ir.»

Uschè ha el exprimi seis profuond desideri vers l'ultim repos in seis «cudesch d'uraziuns per la famiglia ladina».

Pustüt davo la mort da sia amada e fidela muglier, avgnüda l'an 1925, soffriva el ferm e sias forzas gnivan vi e plü al main. Ne curas specialas ne l'amuraivla chüra da seis chars nu pudettan restabilir sia sandà, e la saira dals 11 avuost 1927 arrivet quel s-chür mo-maint, ch'el partit da quaiста vita per entrar illa pasch eterna. A quaiста greva perdita, tant dolorosa per sia famiglia, ha tut l'inter

pövel rumantsch, pustüt l'Engiadina Bassa, viva part, ed esters, chi avaran viss as radunar a Scuol la gliעד a quaist funeral, han stovü resentir, cha qua vain lovà in terra ün dals melder Engiadinais. A sia memoria sajan dedichadas quaistas modestas paginas nellas Annalas.

Rev. Otto Gaudenz eira nat als 23 favrèr dal 1869 a Pola, ingiò cha seis genituors avaivan affars, e passantet lura a Scuol üna beada infanzia ed ans da scoula suot l'amuraivla chüra da sia mamma, duonna Gretta Gudench, nata a Porta. Seguond la tradiziun da quaista famiglia, da la quala eiran sortits plüs reverendas, chi avaivan predgià a Scuol, gnit il bain dotà e talentà scolar destinà al stüdi da la teologia. Davo finì la scoula primara frequentet el il gimnasi a la scoula chantunala a Cuaira, lavurand diligiaintamaing e cun bun success, giodand sperapro in compagnia da seis amis dezaintamaing ils dis d'allegra giuventüna. Bels momaints ha el passantà là nella società da gimnastica dals scholars da la scoula chantunala, a la quala el faiva part sco fervent gymnast. Davo avoir fat l'an 1889 ün bun examen da matura stüdget el a las universitats da Basilea, Heidelberg e Turig la teologia. Dal 1894 gnit el tut sü ad Andeer nella sinoda retica e l'istess an cumanzet el a predgiar a Scuol, rimplazzand a signur rev. Janett, chi eira gnü amalà.

Nellas uras da confirmaziun, cha'l giuven predichant daiva quel inviern dal 1894/95, sezzaiva eir ün scolaret ramoschan, chi mà nun ha invlidà l'ögliada clera e bainvögliainta cha quel al daiva. Que eiran bellas uras e's vezzaiva, cha'l giuven teolog eira fortunà da pudair educar giuvnas ormas.

Amo quel an gnit rev. Gaudenz clamà a la baselgia da Schlarina. In quaist bel comün cun sia tipica vita engiadinaisa passantet el insembel cun sia amada consorta, üna figlia da cusuglier da stadi J. U. Könz, e'ls tschinch infants chi als naschittan, 17 fortunats ans da sia vita. Cun grand zeli e perseveranza operet el qua a pro dal bainesser da sia fidela raspada, cumbattand conseguaintamaing cunter l'indifferentissem religios e l'affarisssem, chi as derasaivan vi e plü eir nella val da l'En. Sco vair Engiadinais vezzaiva el cun dischplaschair co cha sia lingua materna giaiva inavò vi e plü ed el nu spargnet ingüns sforzs per impedir que, sdasdand culs ans ün vair renaschimaint ladin.

Dal 1899 surpigliet el la redacziun dal «Fögl d'Engiadina», ch'el redigit cun fin inclet e granda consciensività fin al 1910. Quants bainfondats artichels e bellas meditaziuns ha el scrit in quels ans nel Fögl e seis supplemaint «La dumengia saira».

Cul arrivar dal prüm tren tras il tunnel da l'Albula in Engiadina vèzzet rev. Gaudenz as augmentar il privel per la lingua e l'intera cultura da sia val paterna, e vi e plü d'vantet per el il combat pel mantegniment dal rumantsch ün sonch dovair. Prochatschà da quaist sentimaint convochet el nel december 1904 quella memorabla radunanza nel hotel Bernina a Samaden, chi manet a la fondaziun da l'Uniun dals Grischs. L'allarmand discuors, cha rev. Gaudenz salvet in quell' occasiun as chatta stampà nel Chalender Ladin dal 1919 e nus laschain seguir qua almain parts da quel.

«Ün factur voul però bain esser considerà: Nossa lingua nun po gnir missa in lingia cun quellas, chi stàn nel servezzan d'üna granda naziun. La personifichand, di eu: Ella as retret qua in quaistas vals montagnardas per fixar da bel prinzipi la mira da sia vita e'ls confins, infra ils quals ella voul restar. Da bel prinzipi nan non eira ella intenziunada da's metter nel servezzan della scienza, dellas scopertas ed invenziuns modernas. La volet esser e restar la lingua da conversaziun per üna pitschna populaziun e servir als bsögns ils plü interns dell' orma umana. Dieu e patria, amicizia ed amur eiran sia devisa, e, guidata da quella, salvet ella seis introit nel sain della famiglia romantscha. Là as stabilit e's familiariset ella, as mossand vigurusa e flectibla, richa e buna avuonda per ogni ün, chi volet s'inservir d'ella. Quant vigorus sun ils plets e schlassas las chanzuns, chi inflammettan dal temp della refuorma noss babuns per la nouva doctrina, e che agreabels sentimaints vegnan uossa resvagliats in nus, cur cha chattains coura nel ester ün ami e contschaint, chi'ns salüda per romantsch e clama subit la lingua, chi'ns ais chara. Infra quaists limits e confins as svilupet nos idiom successivmaing nels ultims seculs. L'ultim pür ans portet la fondaziun della Società Retoromantscha, il Dizionari Pallioppi, la publicaziun dellas Annalas e. u. i. Plü co mai fütta lavurà a prò del svilup e progress da nossa lingua nel temp ultim scadü, usche ch'avains bler plü motiv da discuorrer da sia forza e sandà co da sia vegldüm e deblezza.

S a.! Cun che radschun as clam dimena a defaisa sül ripar? Na per motiv cha nossa lingua füss stangla e debla, dimpersè per

motiv ch'ella ais ün uschè pitschen factur in noss' Engiadina e vals limitrofas, tuottaffat dependent d'oters plü grands e predominants. Nus stovain laschar libra cuorsa al temp e sias tendenzas. Üna nouva importanta porta s'ha averta al ur da nossa val, aintasom Val Bever. Bön e mal entrerà per quella plü spert co viavant. Sperain bler bön e bun in favur d'ün san svilup dellas relaziuns generalas. Rapport a nossa lingua sarà eir quella porta üna nouva domanda: Quant lösch? Chi's regorda d'ella? E chi la defenda?

Nus stovain tscherchar d'interessar il pövel romantsch per il mantegniment della lingua da noss babuns, da svagliar in quel il sentimaint della valur da nossa favella e'l sentimaint da dovair per sia defaissa. A tal scopo servissan in prüma lingia reuniuns famigliaras, ingiö chi gniss discurrü exclusivmaing romantsch. Ün referent füss bain da chattar; ma lura eir la giuventüm stovess as prodüer cun qualche producziun e recitaziun e noss amo adüna numerus poets ladins recitessan la plü bella da lur bellas poesias! Ma tuot que ch'eu giavüsch, saran be «pia desideria», voul dir bels e buns giavüschs, chi nun as realiseschan, scha nus nun ans organisains e scha l'organisaziun nun proveda per la realisaziun. Nus engiadinais fain per regola part da 12—24 societats, chi proseguessan quaist e quel bun scopo, e pajain fidelmaing nossa contribuziun. Amo üna società o uniun populara a scopo da svagliar in nos pövel l'amur e l'attachamaint a nossa prüvada favella materna, ais ella surplü e da massa? Eu am permet da'ls preschentar la domanda e ris-ch da sperar: Ch'ella dvainta e crescha, l'uniun populara romantscha ladina chi chatterà mezs e vias per effeuar successivamaing, que ch'ella scriverà sün sels program e sia bindera. Fiat!»

Grazia a l'instancabla lavur da Gaudenz e d'alchüns oters buns rumantschs e rumantschas, chi l'han assistü da prinzipi innan fidelmaing, ais l'Uniun dals Grischs creschüda vi e plü e fuorma hoz üna schlassa organisaziun pel mantegniment da nossa lingua materna. An per an celebreschan ils rumantschs in Engiadina e contuorns, nella chapitala grischuna, in diversas cittats da la Svizzra bassa, sco eir in Italia, ingiö chi as chattan colonias da rumantschs, lur festa ladina. Il Chalender Ladin, l'organ da l'Uniun dals Grischs, chi compara daspö l'an 1911, ais dvantà culs ans il vair cudesch popular da la famiglia engiadinaisa. In sias duos prümas annadas füt quel redat in sia part literara da nos valent poet ladin P. Lansel.

L'an 1912 avaiva rev. Gaudenz, as fand sentir vi e plü in el il desiderer da turnar darcheu nel lö da sia beada infanzia, surtut la prevenda da Scuol. Dal 1913 davent fin al 1926 pisseret el pro las otras fatschendas da l'U. d. G. eir la redacziun dal Chalender. An per an contegna quel dasper las relaziuns davart la lavur da l'Unien e'ls progress ed insuccess da quella, prodots da sia penna, saja meditatiuns religiusas (Dumengia saira), sias predgias salvadas in ocasiun da l'inauguraziun da la nova chasa da scoula a Scuol 1912 e pro l'apertura della lingia ferroviaria Bevers—Scuol 1913, referats, requints ed artichels.

Da sia predgia salvada pro l'inauguraziun da la lingia Bevers—Scuol als 29 gün 1913 sülla piazza festala reproduain our dal Ch. L. 1914 il seguint:

«Eir las ouvas del uman sun grandas e considerablas. Pensain! In duos uras da Scuol a Samaden! Ün momaint in Val Bever; desch minutas nel sain e nel s-chür della muntagna, lura — tuot dindetta-maing — ans vain incunter üna granda clerità, sco la glüm d'ün oter muond. Per quant plü ardainta ais daspö quel venerabel evenimaint stat festagià avant desch ans a Samaden, noss' Engiadina al vast muond della cultura e del progress modern? La muntagna ais uossa averta per l'intera Engiadina. Tras l'apertura aintra la clerità e festina as derasar giò per la val. Ma nus savain, cha la medemna via ais eir averta alla not e sia creaziun. La ferrovia nun ans porta be bön, dimpersè eir mal. E m'algordand da quaist fat incontestabel, m'algord eu da quel bun Engiadinais, chi ans ha dunà sias megltras chanzuns patrioticas e chi reposa sül sunteri a Cuoir. Lönch avant cha la ferrovia vegna in Engiadina, vazzet el nel spiert, co ch'üna deessa pajana as fet via tras la muntagna, entrand nella val. Ed ella giaiva semnand da lö a lö. Que ch'ella semnaiva eira or, or net e s-chet. Ell' as retret, e tuot spettaiva cun brama e spranza sün buna e richa raccolta. Ma mera! Quà creschittan plantas velenusas sü dalla terra, e'l lö della spranza dvantet lö da plant. Eir eu stess in quaist di, in quaist lö cun algrazia supressa, sch'eu savess, cha la sort ventura da nossa val füss dependenta be dalla casualità da que cha la ferrovia ans porterà. Ma eu muntet quaista chanzla per celebrar il nom da quel Dieu, chi sta sur la cultura e tegna eir ogni progress in seis man. El maina nan pro nouvs privels; ma con ils nouvs privels

as preschaintan eir nouvs mezs da defaisa. El maina nan pro nouvs grands pensos; ma cun ils nouvs pensos crescha eir la forza e l'energia da'ls realisar. Sco ch'el ha adüna provedü, provederà'l eir venturamaing. Cur cha'l privel ais il plü grand, vegnan nouvs profets, homens inspirats dal spiert sonch. Quels guideran il pövel ed il maneràn sün la via da virtù e nouva cognuschentscha del Segner. Sainza quaista cretta noss' algrezcha non ais ne netta, ne completa. Ma siand cha nus l'avain, schi recomandain nus ad el nos pövel e nos pajais.»

Ad «Ün pèr notizchas davart St. Gian a Schlarigna», ch'el publichet nel Chalender Ladin dal 1919, laschet rev. Gaudenz seguir la seguainta bella poesia:

La pèsch della fossa.

(St. Gian, 26 October 1897.)

Il vent vo giò per Val bischand,
Crivland fin aint ill' ossa.
Uschè vo il pisser girand
Pel muond con fraida mossa —
Ma vus, chers morts, dormis in pèsch.

Eir tü, cher vegl, antic clucher,
Hest vis del muond fadia,
Lavur, tormaint e'l travaglier,
Cha'ls staungels haun acquaia —
Ma vus, chers morts, dormis in pèsch.

Intuorn, intuorn, ais tuot scu mort.
Ma tü simbol da spraunza,
«Epheu» bain cler dist nossa sort:
Sperer a resüstaunza —
Ma vus, chers morts, avais la pèsch.

Cha'l redactur dal Chalender Ladin savaiva eir depinger umans, ans mossa seis requint «L'anguel da Joseph Hingel», comparü nel Chalender dal 1923, nel qual el ans requinta la vita d'ün pover chalgeret austriac. E cha nos Gaudenz savaiva eir avoir bun humor, comprovan las seguaintas lingias our da quaist requint:

«Ma inamurà, schi fich inamurà eira el tuottüna (in Maria, la figlia da seis prüm patrun) e daspö quel temp as fet üna müdada, chi restet caratteristica per l'esser da Joseph Hingel.

Il giarsun faiva sia lavur, sco per avant. Ma ogni tant riaiva el suot oura. Ils oters giarsuns s'inacordschettan da que bainbod. Ed ün di, ch'el passet oura, dschet ün a l'oter: «Jesus, Maria, ist das ein Träumer, der Joseph». Que vuol dir in romantsch: «Che sömgiader!» Eir il patrun s'inacordschet, che'l ria sovent, ed al dumandet ün di e dschet: «At vaina ad immaint qualchosa d'bel Joseph?» E quel di prorumpet da nos Joseph quel tipic, indevastabel

Ha, ha, ha!

chi l'accompagnet in buns e mals dis tras sia vita, sco il solai, chi as fa adüna danövmaing via tras las nüvlas; e'l «ha, ha, ha!» eira amo pro e cun el qua il di avant ch'el moura. Hingel eira d'vantà per uschè dir poet; el faiva rimas. E cur ch'el avaiva chattà üna, per quant stupida ch'ella podaiva esser, stovaiva el rier nel cour, cha las larmas currivan giò per la fatscha e'l vainter squassaiva. La prüma ch'el fet tunaiva:

«Drinn' brennt's so heiss
Und niemand nichts weiss»

e quella al paraiva fich bella; ma ün oter di, ch'el eira sulet e chi al gnittan ad immaint ils plets:

«Joseph und Marie,
Wie lieben sich die!»

stovet el rier e rier da nun podair inavant con la lavur.»

Reprodüain qua our da la «Dumengia Saira» Ch. L. pag. 71 eir üna reminiscenza da viadi da rev. Gaudenz:

«Viagiand dad Innsbruck a Salzburg, avet eu occasiun da far ün pitschen servezzan ad üna giuvna, chi eira in compagnia da sia mamma. Que füt bain il motiv, cha nus cumanzettan in seguit a discuorrer insembel. Eir ün pitschen servezzan e qualche amiaivlezza promova qualvoutas la confidenza tanter uman ed uman; e chi chi füss forsa restà tschantà indifferentamaing ün sper l'oter, s'guarda ün pa plü bain nels ögls.

Dimena poss dir, cha que eira üna fich bella giuvna cun chavels blonds ed ögls blaus cun pupillas nairas, chi glüschivan e paraivan da s'ingrandir mincha vouta, ch'ella guardaiva nan. Intuorn ils flancs

avaiva ella üna tschinta da chüram ed in quella ün püschel d'fluors. Guardand la bella matta e las fluors smarridas, am fet que evidentamaing impressiun. Las fluors m'algordettan a mia giuventüna, chi ais dalönts sch spassida, sco ellas. Eu pigliet lura eir curaschi da la dumandar, chi chi l'haja permiss da portar mia giuventüna uschè avertamaing intuorn. Ella, in ogni möd üna giuvna fich intelligiainta ed educada, s'inaccordschet subit, che chi'm mancaiva e chi s'avaiva sdasda ün' increschantüna in mai, sco ch'ella s'anunzia in occasiuns specialas pro ün e l'oter uman. Bain perque remarchet ella, cha scha quellas fluors sajan il simbol da mia giuventüna, schi ch'ella las metterà nell' aua per vair, schi's remettessan, ma scha l'experimaint — sco probabel — nun reuschirà bain, schi ch'ella nun as fetscha puchà da mai e nu'm vögli neir invigliar. «Eu mai nun am lascherà increscher da mia giuventüna», dschet ella suot vusch, forse per cha sa mamma nun piglia notizia del pled. Eu l'avess gugent dumandada co e perchè, ma penset cha que nun sajan dumandas da far. Intant as fermet il tren, e mamma e figlia sortittan. Eu pigliet dad ella cumgià cul salüd del pajais: «Hab' die Aehr!»

Meis impissamaints restettan amo lönch pro las fluors smarridas; ed eu penset, che mâ ais l'uman e che differenza tanter ils umans! Guardand alchüns umans, as podess crajer, chi hajan retschevü tuot la fortuna e chi avessan plü co motiv d'esser cuntaints. Ma sovent confessan güsta quels, ch'els nun desideressan in ingün möd da «cumanzar da prüma». Oters, forse stats scurznits in blers rapports, tegnan ad aquint d'ün toccet da lur vita, chi'ls para dad esser stat bel e rich e retegnan, chi nun saja motiv da s'almentar plü tard pervia da qualche stainta e fadia, «schi s'ha gnü eir seis bels e buns dis.»

Saviand, chi as stopcha ouravant tuot tscherchar da svagliar e rinforzar nels infants l'amur per nossa lingua materna, avaiva rev. Gaudenz fingià divers ans avant chi compara il Chalender, dedichà als infants ladins «Il dü da Nadal», chi gnit lura redat dal 1911 d'avent durante 16 ans cun granda consciensiusità da sr. prof. Puorger. Ün' otra publicaziun per ils infants füt la gazettina da scholars l'«Aviöl», chi cumanzet a comparair l'utuon 1916, redatta uossa insembel cul Chalender Ladin da sr. insp. da scoula Chr. Bardola, president da l'Uniun ed avant fidel agüdand da rev. Gaudenz. Per inflammar

vi e plü ils magisters pel sustegn e la cultivaziun dal rumantsch ha el instituui la Conferenza Ladina, chi as raduna minch' utuon a Zernez. Buna eira eir sia idea da cumbatter tras la publicaziun «s-chet rumantsch» nellas gazettas ladinas e sün fögls volants la schurma da germanissemms ed italianissemms, chi's han gniouats aint in nossa lingua discurrüda e scritta, però il success füt qua displaschaivelmaing pitschen. Granda fadia as det rev. Gaudenz eir da principi innan per stabilir ün' ortografia impegnativa per tuot l'Engiadina. Las continuadas contraversas e polemicas in quaista domanda l'han fat bler displaschair. Per promover la producziun literara in nossa lingua ha el organisà minch' an concuors literarics, chi avettan il prüm temp buns success.

Ultra il grand nomer da bellas lavurs, cha rev. Gaudenz ha scrit pel Chalender Ladin, ha el publichà dal 1906 e 1907 nellas Annalas üna buna biografia da cussglier da stadi J. U. Könz (A. XXI) e diversas chartas da medem (A. XXII). Separadamaing laschet el comparair seis referat davart Jon Martinus ex Martinus e sia filomela, plü tard üna seria da bellas predgias, ün cudaschet da devoziun e l'ultim dal 1924 ans regalet el seis «Cudesch d'uraziuns per la famiglia ladina». Tuot quaistas publicaziuns dan testimonianza da la ferma cretta e'l profuond sentimaint religius da rev. Gaudenz.

Sia lingua ais adüna ün s-chet, exemplaric rumantsch, seis stil cler, simpel e liber da tuottas frisas, sco ch'el eira sves, simpel e modest. Our da tuot seis far as resentiva ch'el faiva tuot la granda lavur our da spür amur per la buna chosa e na per as render important. Co s'allegraiva el adüna cur chi as faiva sentir darcheu qualche nov combattant pel rumantsch. Uschè han sdasdà eir las «Vuschs da Cassandra», chi strasunettan dal 1919 our da la val da Schons ün viv rebomb in seis pet ed el ha sutgnü quaist clam d'allarm, chi manet grazia al sabi e perseverant proceder da sr. cussgl. naz. A. Vital, pres. de la Società Retoromantscha, a la fondaziun da la Lia Rumantscha, chi as ha svilupada suot l'energica direcziun da sr. G. Conrad e fuorma hoz il ferm liam chi unischa tuots ils rumantschs.

Sco raverenda eira il defunt ün servaint dal pled divin nel vair sen. Our da profuonda persvasiun e vair amur cristiana tscherchaiva

el da cufortar ed edificar ils travagliats ed agrevats, e ferm a cour as staiva l'educaziun da la giuventüna.

«L'incumbenza speciala della baselgia ais: d'augmentar la cretta, e l'incombenza speziala della scoula ais: d'augmentar las cognuschentschas. — Ed uossa vain l'incumbenza comüna da baselgia e scoula: la plü granda e bella e quella chi sulettamaing da norma.

Eu giavüsch, ch'els podessan restar lontan da nus, plü lontan possibel, tuots quels chi crajan, cha la vita saja be ün combat per l'esistenza e cha nus consequentamaing lavuran, combattan e'ns fadian, per viver plü o main bain. Que sun ideas e teorias inspiradas dal bap della s-chüördüna e della perversità! *Il scopo* da nossa vita ais evidentamiang ün oter. *Il scopo* ais üna creschentscha ed üna victoria spirituala, üna victoria del uman intern sur il muond, chi l'attorniescha, sur la possanza del mal. *Uschè* eir la mira suprema della scoula non po esser be quella, da furnir l'infant da tschertas cognuschentschas, anzi la mira sto esser e restar quella: cha teis figl dvainta ün hom e tia figlia üna duonna! Vus avais bain udi, ch'ün hom sabi del temp antic avaiva impizzà da cler bel dì üna lanterna, uschè cha la gliעד s'instupit e domandet, che ch'el fetscha ed ingiò ch'el giaja? Ed el det la cuorta risposta: «Eu vegn a tscherchar ün hom!» O schi, scha nus nel dì d'hoz impizzain la lanterna, schi chattain nus blers umans fich intelligiaints e da richaas cognuschentschas; ma scha que sun homens? — que ais ün' otra domanda. E l'istoria dels dis passats am mettet displaschaivelmaing massa sovent il fat avant ögls, cha nus stovain ir, specialmaing da quellas varts, pro quels dell' intelligenza e dellas cognuschentschas, per scoprir la plü expressa mancanza da character e'ls plü rafinats ingiannadurs, chi vivettan sün terra. Savais diletts, cha nus avessan ad onta da tuottas bunas scoulas e progress del temp motiv, d'impizzar la lanterna, perchè il numer dels homens non ais creschü, sco chi's podess suppuoner e sperar! Datta'm ün hom, vairamaing ün hom, uschè as podess clamar quà e là, hoz e daman. Eppür cha que ais la questiun da tuottas questions! Ün uman, chi vain a cognoschentscha da seis esser e da sia valor, ün uman, sül qual po reposar il bainplachair da Dieu e dels conumans! O, non ais que tschert: Scha l'uman ais bun, schi ais tuot bun sün terra, e tuottas relaziuns concernentas sia vita, i saran uschè bunas o uschè malas sco el. La masüra da tuottas chosas ais e resta l'uman!»

Uschè s'exprimit rev. Gaudenz tanter oter in sia predgia, salvada als 6 october 1912 nella sala da la chasa da scoula a Scuol. Que al faiva mal da vera co cha l'umanità d'hozindi chamina sün otras vias cò quellas ch'el tagnaiva per salüdaivlas, ch'ella croda vi e plü nel materialismo e perda il sen per las chosas spiritualas. In fond sarà que bain stat quaist il grand conflict, dal qual si' orma soffriva dad ans nan vi e plü e bramaiva vers la patria eterna. E cur cha sias forzas al banduunettan, ch'el nu pudaiva combatter plü sco avant per que chi l'eira sonch e bel, get el a posar, davo s'avaireret tras sia enorma lavur a pro da nossa lingua rumantscha il plü bel monumaint. Fintant cha'ls rumantschs seguiteschon a seis exaimpel nella defaisa da lur lingua, il rumantsch nu morirà.

Uossa est tû i a chà,
Pos etern hast tû chattà;
Liberà dad ogni fasch,
Poust posar in quaida pasch.

Bler lavur hast accompli,
Na lavur be dad ün di,
Per l'etern t'hast sfadià,
Ta memoria restarà.

J. L.

